

四庫全書

集部

欽定四庫全書

集部
懷星堂集卷六
七

詳校官監察御史臣曹坦

中書臣劉源溥覆勘

總校官庶吉士臣何思鈞

校對官中書臣朱烜

謄錄貢生臣陳昌敬

欽定四庫全書

懷星堂集卷六

明 祝允明 撰

近體

悲秋 三首

年年吟嘆到悲秋，心語因循竟未酬。
日似寶珠容易擲，道如滄海等閒求。
愛憎袞袞風千變，今古茫茫貉一丘。
老子自憐深興近，誰將雙眼上南樓。

荏苒來鴻去燕期，騷人切切有相宜。
漢宮新調初翻葉

素女哀音半破絲欲賦心懷無那意少咨時事未能癡
長風短雨時時過為暑為涼不可知

野老今年齊騎省不從今日見毛斑行過日月知多暇
坐愛星河不可攀俯仰隨時看物易尋常談事到身難
登登兩屐江南閣蒿目西風望子山

秋宵不能寐

官街徹夜鼓聲悲萬古渾無至靜期百事生來酒醒處
七情傷向夢回時紅顏交代將人誤青史升沉與世移

獨起挑燈映窗坐秋光月色共參差

丹陽曉發

京邑到來熟曉行如赴家月明人渡水星散樹驚鴉燈影依依店茶聲遠遠車蕭騷兩秋鬢無處定生涯

旅情

旅食慙工部分攜念孟光歲時臨俎豆風露警衣裳滿月當春面明霞見晚粧情懷宜自遣看是買臣鄉

江行二首

渡口人爭發出江舟已微鐘聲離岸小帆影逐星稀朔
雁連雲度寒潮伴月歸蒼然山一帶隱隱伏長圍

丹陽連北固千里草萋萋東去水逾急北來身漸低漁
舟長宿火客枕厭聞雞風景年年是因無妙句題

長途

長途只是水連天好景惟應月帶烟獨有流鶯與飛絮
見來渾似綠牕前

看月懷內

看他夫孺作嬌稱擬向君王覓與卿想得夜深刀尺罷
推簾獨自下階行

答錢二

病喉少日兼辭酒養性經年不有花君問情懷看此紙
新詩字字學唐家

代東園梅見嘲

祝家園裏一株梅舊是三郎手自栽今歲寒花開欲盡
三郎何處不歸來

燕京陌上遊妓

相逢無路避青蛾十五燕姬細馬馱
老眼年來觀道熟
妖嬈知柰石腸何

京館聞鶯

天風吹出掖垣聲
澗澗暎山午夜笙
錯認閭門折楊柳
一時飛夢滿江城

宮詞

非謫非真是甚仙
紫雲橫截大羅天
依稀記得人間事

十四封紗二十年

詠都城賃騎驢馬

紫陌東西苦不禁
朱門飽秣卧花陰
知君未是登臺骨
休道昭王不掛金

自末春入初夏歸舟即事

往往花移色交交
鳥換鳴雲將京國
遠水別衛河清高
嘯迎風轉低眠看
樹行殷勤吳郡酒
還得此時情

沿潞河直達淮許岸柳蔚然

金一八八
卷六
璫瓏翠玉芳陰茂窈窕姪娥婉態多不是一行千萬个
荒天寥落柰情何

黃樓

落日照徐彭長隄上下乘黃樓不知處洪水尚襄陵客
子能懷警官亭試一馮波濤終古險來往自頻仍

盧溝橋

四海修梁祗有二盧溝雄冠帝城邊下臨窅窅疑無地
上接茫茫恐是天紫蜺平飛通碧漢白龍橫卧破蒼烟

牛車百兩春雷過愁壓幽燕地軸偏

法駕

蔚藍天上鬱蕭臺五色雲旌雉尾開法駕幾多牛馬走
不容凡世一夫來

卧病

同人相見總相稱一級名階只未登此事苦難多著力
拙夫甘道實無能壚邊豈有昇天客榻上分明坐夏僧
一片商顏半江水儘堪黃綺與莊陵

宮詞

黃屋巍巍坐九天
烟雲千疊蔽嬋娟
流鶯回首宮牆遠
妾負紅顏二十年

兒子續入對大廷感激因賦

先公磊落傳臚處
老父迂遲失馬中
未必遠尋鼃董策
青箱猶可獻重瞳

兒子召試館職

黃紙書名已異恩
玉堂觀藝復何論
持將宣室當前席

幸有丹衷世世存

兒子召試後忝竊收錄遂蒙欽改庶吉士留學

翰林

文帝弘謨遠明王懋舉初望應非曲學功欲得真儒給
膳攄文思休朝讀秘書養成台輔地嗟爾意何如

舟中憶續

功名爾已誇雛鳳情愛吾猶媿老牛悵望燕山雲海隔
曉風吹夢過滄洲

追和皮陸夏景沖澹偶然作

綠漫衡皋帶茂林
林亭遙對接
踈襟江涵竹影鋪
豐席雨泥梅蒸溽
素琴檻水生漪浮
澹爽棟雲團
蓋落虛陰人間最是難
消此未解塵名誤
道心

間居秋日

逃暑因能暫閉關
未須多把古賢攀
并拋杯勺方為懶
少事篇章恐礙間
風墮一庭鄰寺葉
雲開半面隔城山
浮生只說潛居易
隱比求名事更艱

婁江舟中述夢續事狀

相慰華堂下重逢草野中
塗鴉猶習幼策馬拯塗窮
恩愛千年定精誠一刻通
直能呼共老天壤有移鴻

壬申閏五廿六曉紀懷

龐葛空聞有鳳姿
仲謀聊可道佳兒
病身日對千戈卧
別淚時看尺素垂
半夜雞聲猶慷慨
平生驥足竟驅馳
無因便把漁竿去
羞向斜陽弄鬢絲

絕句

白眼青天萬里心
門前世事正浮沉
日斜睡起無聊甚
獨倚闌干看樹陰

淚 二首

昔誦江東詠淚詩
看來別有一般時
孤衾獨枕斑斑處
半屬吾親半屬兒

魯國潛然可柰何
洛陽年少更能多
靜中怕似姦和婦
換作臨風兩韻歌

壬申夏夜不寐

冷暖光陰不盡來
流年五十豈徘徊
半牕明月三更後
起步中庭幾百迴

醉

斷酒二年偶復一醉為
此壬申季夏十七日也

醉來中歲裏那復有童心
祇覺忘人我何為更古今
山河秋兀兀星露夜愔愔
惆悵惟陶阮懸知磊砢襟

苦憶

苦憶京華更不禁
百壺那解一生心
爭誇膝下簪纓好
豈識癡翁別有襟

對酒

對酒無歌舞看天只詠詩
唐賢文滿案半是亂離詞

山

深塢高峰處處寬尋常歌嘯等閒看
城門欲閉無船渡却笑今朝要入難

詠牀頭劍

三尺青萍百鍊鋒流年三十未開封
藜牀且作書生枕只恐中宵躍卧龍

早春江行

五十六年行役身又漂萍葉及初春
柏燈向壁吟殘句
江雨敲牕夢故人鶯轉上林空倚醉
月生南浦幾傷神
還家想得兒童笑毛髮蒼浪綠綬新

乙亥五月五日王僉憲文明邀宴廬陵螺川驛

樓觀競渡

提刑玉節照清江客子遊觀喜大邦
夾岸魚龍爭得水

謂競渡舟

中流笳鼓雜飛淙國謀幸駐旂
帷問鄉思微從俎

卷六
豆降欲待梅花開後寄只應遷轉忽移幢

縣齋早起

縣小才疎政未成披衣衝瘴聽雞鳴
向來嘯傲知多暇老去驅馳敢自寧
有物解將王路塞何人填得宦途平
拙謀果是因微祿好傍吳田晏起耕

縣齋

縣齋孤坐暫澄懷未覺飛光兩矢催
夜雨鄉關歸夢久夕陽門院壯心迴
非因傲吏偏違俗且喜微邦稱不才

坐起忽驚詩景入西南山色隔城來

歸與

炎洲閉戶賦歸與縣尹何妨委巷居奪祿浪言耕有代

予丙子冬暮入廣上司以拙於催科秋稅後期停給俸米文移在縣而予身在廣也旅行誰信出

無車空慙河上深藏賈却笑闕門強著書莫道文章誤

公事文章今誤復何如

循州春雨

物候逢春好春來悶轉深山城十日雨家國百年心海

吹饒生冷蠻雲易結陰循州本謫地何待此愁吟

戲作口號

道惠何曾惠言寧又不寧一春眠裏過三日水中行坡

老荔猶澀陶公酒未成哥哥渾不顧枉費萬千聲

方吟
適吟

子規遂
為結句

廣州戲題

生世投閒四十年瘴江班頂試鳴絃今朝也是為官日

白日青天閉戶眠

丙子重九戲題

行年五十壯游腸幾把他鄉作故鄉
萬里一身南海畔
客窗獨看雨重陽

題廣州客邸壁間

故國閒居四十年
踈慵雖樂怕違天
天應尚念踈慵態
又使閒居瘴海邊

戲為口號

遠人羈客古今悲
昔日慵看惜別詩
六口一家分五處

爭教不作斷腸詞

廣州別表弟趙二

海邊三載試琴才省問煩君兩度來
天濶風鵬嗟轉徙
秋深霜雁獨飛回計程驛路過江權
屬買漁簑挂釣臺
別酒多傾也能醉歡情不似故園杯

江沱已喜干戈定吳越猶聞稻蟹肥
把酒正看黃菊好
凝眸無柰白雲飛鄉間訊遺情
減中外聯行爾我稀
幸為經營石湖畔秣田三畝一苔磯

己卯春日偶作韓致光體

亡羊何日返初歧
失馬由來未用悲
靈藥不消心底火
世情猶惡夢中棋
三年紫陌長虛屐
一紐銅章只礙詩
好景好將閒領取
淡烟明月兩參差

庚辰二月廿七日曉官窰舟中口號

世棋年矢兩相催
絕嶺春深與雁回
無限胃中未酬事
蓬牕燈枕酒醒來

危機

金史四庫全書
卷六
世途閉步即危機魚解深潛鳥解飛欲免虞羅惟一字
靈方千首不如歸

夜歸

雨洗秋光萬井明風高雲破月微生還家莫道長酣寢
纔聽雞聲又出行

看山

嶺海看山旅思空歸來還入畫圖中平生愜性仍知己
只有青山處處同

冒冷行役

誰使衰年冒冷行，幾般辛苦幾般情。
重重樓閣深深閉，家隔東南四座城。

宦游句曲偶讀丘殿丞寄茅山道友詩有感遂
次其韻

珠有餘妍玉有輝，雞栖鶴馭本相違。
靈飛碧檢文難讀，想結金堂夢易歸。
頗恨殿丞虛左契，終憐長史入仙機。
懸知紫陌埋塵骨，綠草茸深白鹿肥。

句曲道中

老至誰憐晝錦明春來聊得客襟清
宵依星斗宮壇卧
曉入神仙宅舍行
眼看山多城郭少
肩挑詩重簿書輕
何時總入烟霞去
不見人間寵辱驚

傷

三年兩度哭亡兒
莫怪衰翁舐犢癡
誰使為生便為死
可堪成喜亦成悲
青蛾怨積蘭枝夢
黃壤能酬瓜瓞期
等是人間慈孝事
缺

次韻表弟蔣煜及門生翁敏見贈喜子歸田之

作四首

中條不改舊王官猶喜書淫共士安漢女紅顏非自誤
阮公白眼向誰看農人問稼教多秣道士裁筠贈作冠
日喜車來皆長者祇應姻舊倍添懽

荷鉏欣種淵明田坦腹還如懶孝先登山自蠟平生屐
載酒時過遠近船焉知魚鳥升沉性齊得椿菌小大年
却笑人間心尚在欲將青史訂愚賢

金少日... 卷六
一
忙是揮毫靜奕棋
雕闌日轉夢回遲
時從王右軍臨帖
戲學張京兆畫眉
傍水近開三益徑
停雲徐詠四愁詩
新來最滿平生意
樓上看山獨坐時

高眠不怕喚當關
一月華胥游未還
意在可無無可處
身居材與不材間
瓊敷玉藻六七子
金雀雅頭十二鬟
愧有金陵無李白
棲霞即是虎丘山

口號 三首

枝山老子鬢蒼浪
萬事遺來剩得狂
從此日和先友對

十年漢晉十年唐

不裳不袂不梳頭百遍迴廊獨步遊步到中庭仰天卧
便如魚子轉瀛洲

蓬頭赤脚勘書忙頂不籠中腿不裳日日飲醇聊弄婦
登牀步入大槐鄉

卧病

鞅掌思將適野情偶緣風火便相嬰懸知智鄙同為虐
且喜閒忙總不行服餌轉令諳物性靜思因得檢平生

金史曰... 卷六
醫經士典都餘策一卷南華萬物平

無題

亭角樓牕取次憑東風不送笑歌聲山村水郭城西路
却放朝雲此處行

病卧北牖仰見飛鷺戾天忽然口占

海國秋炎紫漢空一聲深入太霄中回看五嶽三山近
略望千流萬壑通未必綵鸞能瑞世可憐黃鵠不離籠
因思兜率黃金地金翅擎波護鷲宮

寶夢

牕外星河五鼓天香凝紙帳裏雲眠遙尋鶴夢游塵外
却怪雞聲到枕前拱壁光陰悲此日懷珠奔走笑當年
知音總沒惟懷古卷裏相看共默然

衰病

半年衰病入秋深減却肌膚長道心不省門前猶市井
忽瞻牆外是祇林一端惟靜為甘味萬緒都忘遂苦吟

缺

病閒

病閒身懶趣偏長
書策縱橫擲滿牀
醫業探尋勝士業
閨房清寂似禪房
青春總誤今何及
白晝長閒夢始忙
此境可留終歲月
豈須重覓引年方

漢室

漢室咸陽建山河
百二開甘泉芝草出
天馬大宛來宣室
宵衣問長楊獻賦回
寧知天祿閣不用子
雲才

滄浪池

出巷少人烟林霏四望懸冷光涵曲徑沉綠漾平漣古
寺依大殿高城瞰野田每經思版築忘世更懷賢

宿金山寺

窓中一抹海門焦珠貝魚龍共此宵枕得善財參後石
洗來天漢轉時潮神遊會解靈妃珮耳靜能傳少女簫
況是梵王宮闕裏蓮花葉上暫逍遙

夏日遊慈雲寺

命儔乘暇日散步入慈雲野氣能遙接秋光自獨存小

山侵竹尾細水護松根衆果都連苑繁花雜植園廢興

徵老衲文字哭孤孫

朗僧出先公畫
題誦之法然

卻幸重來好禪牀

許北軒

舟過故表伯父王氏宅前有感

輕舟獨汎午時風車馬當年一日空綠水青門暝紅樹
一時都入感傷中

秋晚由震澤松陵入嘉禾道中作

二首

晚發西南郭秋深雨氣偏人家低似岸湖水大於天日

掩長如閣風檣不用牽辭燕還入越纜費半流年
湖尾橫波急船頭轉港頻幾家危傍水一木老存身黃
菊看如客青山坐送人空舟隨處泊不用擇行隣

泊嘉善東橋

石梁礮水浸秋寒一夜霜蓬寄釣竿是處風光解題品
江湖莫作旅人看

途中即景

地迴景逾勝數程無市人隔離花晚暎臨水樹精神村

金
卷六
犬隨船吠沙禽見客親
漸看明月上夕韻想更新

即景復為七言兩韻

臨水樹如朋合志
隔籬花似女懷春
護門村犬還驚客
親棹沙禽忽訝人

錢唐玄妙道院夜賦

枕席錢唐館更時
未止還每當身作客
轉覺意能閒
雨氣橫秋海潮聲入夜
山道人看默坐應
笑鬢輕斑

山牕晝睡

身在雲房夢亦閒
松頭鶴影枕屏間
一聲隔谷鳴華雉
信手推牕滿眼山

晚上吳山風雨驟至

東望海門門忽開
松風十月滾輕雷
山眉一點雲拖黑
知是龍王送雨來

赴報國院海會喜侯二

瑶葛大惲同集

隔水應霜鐘
尋聲入寶宮
刹那依燄慧
六萬繞神通
歡喜來侯白
清真遇葛洪
獨慚文字累
未得此緣空

追賦內相吳公邀往書石山中雜題

上宰邀書睿製篇幸從几席向林泉晨陪松露翻閒語
夜傍賢星聚處眠暫拂古風噓故里喜逢佳衲過山前
兒童日夾先公膝說向當時屢泫然

雨中句容道中喜看山色

洗秋零雨向蕭神京邑風光斬地新馬上會淹京兆客
天涯忽見芴蘿人輕雲淡蕩鉛華薄初日曛曛寶鏡真
便欲涉江嗟未得芙蓉猶自隔青蘋

寓黃輕車宅雨夜禁直歸因戲贈

黃昏冷雨濕金鞍
鞿筋提巡繞禁鑿星散羽林霜氣肅
天臨華蓋夜光寒
鄂君去後衾猶薄
京兆歸來黛已殘
知有游人卧齋閣
一般飛夢出長安

與沈二少剛秋寓建業山院夜話

倦迹憐司馬清風遇
隱侯鄉關不堪問
文酒且須酬水
壓吳王國山橫建鄴
秋高臺仍可喜
重見鳳凰遊

嘲客舍山脚下井

脚帶渾泥氣帶腥
幾家同汲競壘瓶
寒泉只在前山裏
笑殺居人總不醒

幽州歲殘

冠天袖海舜幽州
風候蕭森氣朔遒
雙闕日移仙仗散
六街塵滾晚衙休
馬周卧旅猶觀國
王粲懷鄉獨賦樓
未得邊關擒虎豹
還思江海弄鳧鷗

暮春山行

小艇出橫塘
西山曉氣蒼
水車辛苦婦
山轎冶遊郎
麥

響家家碓茶提處處筐吳中好風景最好是農桑

萬安道中

歷歷長亭過眼頻浮家一舸日隨身江山不苦南征客
星斗應憐北望人劍匣只依書裏佳酒杯全亞藥爐親
牀頭歷日閒拈看一歲無端半已陳

贛州

蕭瑟灘聲怒復幽四程猶未是炎州行人不解居人語
章水相逢貢水流萋葉檳榔湏學啖蓴羹鹽豉向誰求

英賢滿路容參謁珍重昌言日拜收

上下灘

上灘若緣蟻下灘若馳駛移轉頃刻間便是人間事

庾嶺寄謝江西白大叅

士珍

宗憲副朝用二同

年

太原白居易南陽宗少文十年纔並出一日可離羣契
分秋風桂情親日暮雲江波二千里相逐送清芬

山人獻白鷗

草啄萍栖瘴海濱野人攜得肯相分
九還丹顯浮蒼頂
一縷青霞斷白雲五服也知章有德
百禽應是不同羣
縣齋相對悠然想烟水城西日易曛

思食豆腐

蹲鴟亦稱野人腸薯蕷還輸菽乳良
轆釜不聞流素汞
堆槃無復截虹肪舊知學士能為贊
今訝淮王不遺方
只恐南山歸去後苗穉未得快新嘗

失白鷗

何處青冥會一沖短翎應近井廬中來時想見銀塘靜
去後休嗟蕙帳空自笑無魚難久館誰言有鵠不如籠
歸心一夜秋來月吳水吳山幾萬重

夏日城南郊行

古縣周遭景物環政雖多暇倦躋攀偶因送客乘時出
卻得浮生半日間頻過水邊仍有竹忽當林斷遠逢山
但教到處情如此瘴海無妨緩緩還

遊和山麻石巖

山和人亦和乘暇集鳴珂陟嶺美未得到巖竒轉多交
枝樹礙馬一步地旋螺成屋自麻石作門惟碧蘿瞻天
隔鳥道入地學蜂窠樹向頂上植泉從肩畔過禽蟲馮
几住雲靄入衣摩佛座泥三級僧牀石四阿西臨野廣
漠東眺徑陂陀遠吹潛生爽驕陽暫息苛禱祈情敬謹
樂業舞婆娑物穰用亦儉地危心不頗民風都似此吾
為爾陳歌

北郊訪友

風物幽妍上郭寬訪朋因得一迴看家家黃土墻三尺
處處清渠竹數竿欲雨欲晴雲半密如秋如夏汗微乾
苦吟應得山人句却笑龍頭少鷗冠

過林頭看修竹數里不斷甚愛戲題

五寸衝牙丈八矛裝成十萬繞林頭莫欺襟子興寧縣
一半人家千戶侯

和王太學見贈四首

水鑑求才事自公徒令寂寂笑英雄山齋一枕淵明夢

開眼猶慚七里封

道拙才空志不成
錯將言語占時名
無端拋却山林樂
換得軒裳底事榮

草廬藏得卧龍才
許我英雄亦異哉
剛道同心金可斷
江南便是海南垓

三載相看有別離
春鴻秋燕不同時
我尋松菊去方急
君會風雲行莫遲

登越王臺

環城三面碧波圍今古樓臺滿翠微不見越王惟見佛
木綿花裏鷓鴣啼

惠州西湖

西寺東城兩幅圖長虹脊畔小浮屠杭州惠州都遊遍
醉眼時將作石湖

石湖蘇之
西湖也

莆田鄭自修宰河源故厚予四月三日舟過縣
城君以註誤不在予亦以文法行一時風雨
大作小泊沙口而去悵然懷君口占一詩期

後寄之

河源西郭夕陽過不見美人將奈何
雷壓船頭蓬底坐
一時風雨亂風波

三月初峽山道中

春陰春雨復春風重疊山光濕翠濛
一段江南好圖畫
不堪人在旅途中

庚辰三月歸至保昌館李君士元家適士元車
馬有行色廿四日解攜各北南臨歧口占為

贈

梅花關下春雨深
客送主人無限心
鳳生南海莫言遠
明日一飛歸上林

市汊阻風

十日踰千里
三宵滯一隈
旅情忙復緩
歸棹去還來
橫颺摧高木
飛濤激迅雷
坐看村市沒
行路不須哀

宿茅峰

下馬門前一振衣
翠微高迥逼清微
雲邊洞裏真人去

月下山中長史歸丹伏砂牀金燄短术穿崖竇紫雲肥
神方能詠不能遇一夜爽靈峰頂飛

登千佛院塔

八面青紅倚碧天
牕中列坐萬金仙
排雲欲挽三茅袂
拊檻慚升八部肩
盡訝入簷竒影倒
應知出世法門偏
詩題漫道遊觀勝
只得塵勞一飯緣

高淳道中

柴門對樹樹臨流
春日遲遲滿客舟
一種江南千里景

金剛口八
卷六
只聞雞犬不聞鷗

經舊遊

當壚一啜手煎茶
迎客桃花戶外斜
聞得博陵崔護道
不知今日是誰家

詠公館花木

句曲醪醕漂水桃
漂陽孤柏倚風高
家園幾樹桑和柳
何事令人夢想勞

未足句

却恨風光同萬里眼看百里不能歸
憂國天高惟有夢思家懷近不能歸

與句曲李令徐博士等夜飲

洞天福地神仙縣宣化承流父母官自笑樊籠猶閉鵠
却憐山樹亦棲鸞緋英炫幄春方爛紅蠟搖觴酒快乾
未必嘯歌妨杼軸風埃浩浩整清歡

贈江秀才

三日芳蘭入座薰欲將心事為論文仙囊古玉餐無訣

金剛經
卷六
官市新醅飲便醺已羨雄飛難久伏每嗟同調易離羣
茅峰蔣阜無多地未擬相思詠碧雲

宿攝山棲霞寺

寒林日暮息車徒却得南朝最勝區廿載不登禪子榻
一宵權作佛家奴齊梁寂寞名猶是儒釋紛紜念已無
最是宦心能敗道羞將束帶問衣珠

泉洞迷藏草沒梯倚巖千佛坐高低疊襟山色周迴峭
隔樹江聲隱映齊宋刻梁文江令筆龍蟠龜戴上元題

棲霞只是枯禪宅
兩許頭顱向裏棲

枕上紅塵白晝深
眼開欲得息勞心
燈花暗入僧牀冷
山閣馮江萬木林

出湖見山

長湖方出口一帶橫
青山行處必如此
何云出世間

當塗歷陽漂水界
中數還往遂懷李翰林

青山歷歷樹蒼蒼
遠水長天幾夕陽
千載更無仙謫下
只應愁殺賀知章

舟行守風阻險輒睡酣適成詠

行役安危定心間常自如每當驚灩澦偏得訪華胥適
逐牆頭蝶清涵水底魚覺來何以遣枕畔一堆書

謝楊大送梨花栽成

來自清修處士家草堂初就便增華雕欄月上添得影
畫棟雲過分作花園吏引渠經細榦閨娥繞樹候芳芽
洗粧先覓催粧句凭閣巡看幾日斜

謝呂禹平惠玉鞭粉團花

花開根至梢素朶附香條流蘇疊脂粉眉鈿簇瓊瑤不
逐紫駟馬空依翠鬢翹子方理花事先聘汝無驕

中秋日燕客晚雨

中秋美景當吳苑十載佳期共此堂珠履高吟歡滿座
金釵送酒看分行荆娥妬月俄行雨趙女停絃慢遶梁
莫道西巖容易墮朱簾徐捲爛銀光

十六夜召集

廣寒昨夜不曾開今夕佳期已報來且向草堂杯舉待

人間紅粉會相催

為唐子畏索劍

昔年承唐子惠愛曾以雙劍贈答其意別來恒念之其一鏤青

萍二文者尤憶問以一章問之或肯假抑更惠乎

手解青萍昔贈君仗來多少截妖氛知君道就

缺二字後

把與東人割白雲

簡趙西臺

二首

滿月澄寒鏡清霜滌素琴獨攜車後雨去潤豫章林
死恨錢塘水悠悠只向東雁飛雖不止連日有南風

過鄭六升不過

欲作春風上國遊，尋君東海話離憂。
烟波自剪西牕燭，絲管醉眠何處樓。
五夜不逢黃憲面，百壺那解長卿愁。
平生國士青君眼，老矣猶能一笑酬。

送顧司封

華五

守開封

皇輿百郡首開封，良牧分符開治功。
參庭屬吏衣冠滿，繞郭編人耒耜豐。
河山邠鄆千秋固，雲雨乾坤萬物同。
懸知政化平如水，共看漢室美吳公。

戲為朱民部索齋

蘇公屢欲傳冰壺此味能參自信吾為語
版曹朱學士
容厨爭奈併錐無

留別趙上舍

元璧

歸騎聊乘一日間夕陽移座未能還
西風明日丹陽道
回首雞鳴雪滿山

吳文定公挽歌詞

鼎軸參黃閣階符坼紫垣位遷如始筮
人慕過生存一

德天猶格三朝國共尊君臣兩無負元烈荷厯恩
執紼椒塗遠前驅鳳翼還君臣同國運忠愛滿人間
速奪山河繫幽情水竹間吾曹惟淑艾抱籍哭顏山
吾祖懸車日知公釋褐初遂深魚水分亦有兔蘿圖笑
語兒童際衣冠夢寐餘淒涼天下德忍謂及門徒

贈翁隱居

吳郡翁高士森森君子儒風標抗軒冕禮樂在江湖
松露濡談塵匏樽盡酒壺却嫌城市隔欲別重踟躕

答日本使

姓橘名省佐
相國寺僧

日邊來處幾何時聞說占申復到寅

海舶行憑指南鍼
日本本在寅由南

折西指申却迴還近寅
乃中國濱寅讀若夷

遙仰北辰趨帝座卻經南甸駐

行麾詩名愧動雞林客禪諦欣叅鷲嶺師回首山川渾

渺邈只看明月慰相思

懷星堂集卷六

欽定四庫全書

懷星堂集卷七

明 祝允明 撰

近體

簡伊僉憲

七朝熙洽世臣家班序丘樊勢並華忠孝到君傳不匱
韞沽如玉總無瑕園同涑水青山下扉掩閭門小曲斜
老去高情澹如水著書觀物是生涯

西臺伊公枉和贈篇至于再三重次呈答

東野猶居郭外家，閉門高枕歎年華。
秦人不敢窺干木，楚事休教誤屈瑕。
暑氣轉嫌秋候溽，樹陰偏受日光斜。
鴛鴦過辱千金許，慚愧酬知未有涯。

與吳大用飲酒

世事浮雲幾變更，鄰居長聽鳥嚶嚶。
緇編俯仰間今古，青眼摩挲老弟兄。
樹下送闌高嘯飲，水邊瞬袂細吟行。
胷中三十年來氣，終不銷沉負友生。

贈孫山人一元

自稱吟嘯仙

思邈先生不可尋紫麟騎下閬風岑宵眠華嶽星支枕
曉度關河月滿襟驚鶴夢殘飄露葉哀猿腸斷抱霜林
秦臺故有吹簫侶一片宮商萬古心

贈俞隱居

水南雉市萬塵趨水北還容陋巷居三尺素桐陶靖節
百篇華賦馬相如心拋世俗爭為事手錄時賢未見書
欲繼姓名高士傳怕君嫌我近睢盱

寄謝雍

謝家蘭樹有清芬
每誦澄江却憶君
想得山莊長夏裏
石牀眠看度墻雲

贈朱孝廉

性甫

百年貞白舊高樓
傲兀風埃六十秋
楚聘尋常來北郭
魯呼前後只東丘
書抄滿篋皆親手
詩草隨身半在舟
前輩風流惟此老
天公多為後生留

方吳二子償金之什

讀罷償金記
直疑無此人
唐君解言語
高義不成塵

友人郊墅

孤墅倚高原扁舟晚到門
琴聲虛草閣月色滿江村
霜落魚鰕出烟收花竹繁
不須燈下坐臨水好開尊

艇子

江南小艇子能住亦能詩
梁柱無階砌門窗即枕帷
坐流看樹過行屋逐風移
試欲作舟史半生居在斯

題龍蹄洞下有龍母嶂

千峯如帳瞰巖扉靈物何年向
此飛潭底火符玄鐵簡

嶂頭金母白綃衣
海多雲雨應長往
壑暗藤蘿久不歸
洞外蛟蛇常起陸
可能消伏運神機

季冬朔旦汝德周學二秀才過訪病禁飲不能
留別去悵然竟日燭下得句明日寄之

相思旬日忽相逢
不是忙中是病中
玉麈漫誇談柄在
朱顏應笑酒杯空
憐君濟濟冲霄鶴
顧我垂垂失路鴻
吾道若行千載合
不須重歎馬牛風

上元日喜晴東董博士及諸秀才

三月恒陰待此晴燈輝晨暎日華明便趨東郭朝龍馭

又向賓筵聽鹿鳴簫鼓兒童聊祝歲

工元張燈事起於漢祠太乙今俗借

燈為登以為祝豐年之兆耳

犁鉏父老喜深耕雲師雨伯休重惱欲

共溫泉榘楔行

神光山

山郭西南五里強翰林留得讀書堂漫漫古岫雲烟薄
寂寂間坡草樹荒數點遠村鈎望目一間空殿鎖斜陽
山靈我為鄉人問會許何年更有光

贈王希賢秀才

緇衣耿耿此心長，青眼隨人到異鄉。
海外不須誇馬腦，人間誰解識虹肪。
也知老桂為仙樹，豈有幽蘭減國香。
奮翅雲霄應不遠，相知獨愧早稱揚。

謁張文獻公祠

丞相祠堂曲水涯，祠邊仍是相公家。
千秋若解收金鏡，萬里何緣枉翠華。
門外曝牲兼絮酒，嶺頭松樹夾梅花。
人間不乏牛仙客，長攬遺編費歎嗟。

峽山寺

靈區苦不到到亦苦詩難景象絕聞見怪神如等閒地
將海作帶天借山為闕今日却堪恨綠林棲近間

潮州韓文公廟

一世北斗望千秋南海濱文章傳絕聖政事澤時人姓
作兒童字心將動植馴佛靈能有禍終不下臣身

次韻奉和方伯湯公迴鑿志喜之什

五雲遙捧翠華歸北極芒寒萬象依闕塞巖巖分地險

金湯面面自天圍，聖圖六馬知能馭。永命三靈未待祈，
嶺海小臣從國老。中宵魏闕夢魂飛。

傳聞郊祀後，大駕尋復出。狩疑信未得，因用前
韻紀事一首。

窮海歡傳八駿歸，仍聞消息語依依。要荒豈必勞重幸，
帝命今方式九圍。禹服正須垂拱治，堯年何用築宮祈。
明禋眷答皇靈切，長使鈎陳護六飛。

奉和顧憲副梧州謁都憲韓公祠堂

拔地洪材構帝家倚天雄略眇蟲沙誠歸魏闕心懸石
血飲匈奴膽破瓜半夜崑崙樞密宴三言以意伏波車
當時利口今何在老樹闕祠日又斜

夢故知

氣涵珍玉語良金不論窮通話盡心枕上一時南北海
半牕梅影月陰陰

謝湯丈守惠地黃煎

會將雲縷換霜華一七玄瓊入紫霞他日天台莫輕住

要攜徐甲到流沙

夢故人

今古悠悠老客心
酬知何必接蘭襟
爭憐寂寞盧生枕
還恐淒涼子敬琴
吳苑此中非舊社
越江南去是缺林
紙窓秃筆聊成賦
風弄清燈夜點沈

元和愛結過深晤
言之餘復投長句
思子和女
乃就二章意局情饒
聊復爾爾

枝山磊落倚東山
雪檜霜松許共攀
文字虛名今且愧

踈慵物議古來艱平生肺腑篇章內身外金蘭夢寐間
萬卷舊書千石酒兩人相對白頭閑

東園訪梅已謝

故里閒居憶美人開軒延佇御周輪兼旬病起殷勤探
玉鈿飄零徧委塵

愍時

巡遊方罷亂離平豈謂凶饑歲二更桂玉斷來錢貨廢
糟糠空後析骸爭焉知卜史言天道盡望仁人輔聖明

三戶可憐瘡痍在欲憑開鑿了餘生

寄吉安太守徐士元同年

梅闕歸路拜車塵閣皂書來語意勤始信凌雲江海客
能懷閉戶薜蘿人酬知但有篇章舊名世爭看事業新
玉版金根無用遞澗藤崖刻不妨頻

中表甥陳螯子魚久抱微疾懷之得句因寄

俊鶴祥鸞陳子魚閭門樓閣事親居想因別墅聊行樂
却得雲窗漫校書俗駕向來虛下榻德星何日見牽車

身為公子心為士便是公侯已復初

足夢中句二首

遠公蓮作社陶令柳為門止酒用卿法攢眉吾不言白
雲時或出黃菊故應存二老皆寂寞千秋誰共論

聖境不可到魂遊記渺綿花藏竹林院蓮號貝多編龍
鳥如人禮山河繞法筵祗應身本幻此却是真緣

哭周院判

原已 已酉九月二十日賦是
日公還玄宅予以疾不能送

雅道淒涼後何情當此悲斯人不易產中壽豈難期鵬

名
卷七
兆將無驗雞年竟莫支心曾周晚末目不瞑嚴慈地有
顏淵代天無伯道知負公茲一餞西望涕洟垂

哭表弟蔣燾

白玉樓中長吉去芙蓉城裏石郎歸煌煌柱國平生念
看到諸孫內外微

哭陸大參 大量

四海銓書失老成兩朝閨籍尚遺榮達如子貢能從政
憂似布文最善兵幾度老貂新命奪

公在職方累有大
校錄中人超擢公

力疏言遂
收回成命
兩宵幽鬼故寬平
於潛民夫婦為人謀死神語婦魂令白于公婦遂魁

詣公得復
文編諫草離離欲付與機雲續令聲

哭王麟

賓館初違夢尚縻
訃音俄至欲成癡
豈知十日輕談笑
便作千年永別離
絮未陳新總帳
鳳雛空倚舊霜枝
高風幾許堪傳事
誰寫平生入墓碑

答史隨州

經

楚雲飛墨下烟蘿
想見瀟湘又綠波
刀劍已知成孛孛

簿書何處問絃歌
照人顏色春風近
入夢江湖夜雨多
寫就卜居馮問訊
青袍今誤欲如何

訪華光祿

汝德

高堂此始登蘭韻
久熏蒸榻定叨徐
稚門今識李膺傾
瞻疑夜燭笑語泮
春冰綠合沙頭草
歸舟發未能

廣川城

辛未重五經過成水部留飲
二鼓出城馬工作時有寇警

皎月浸巖城
蒼蒼百雉橫
木梁懸絙下
竹柝夾輦鳴
水部從時飲
山人入夜行
因思趙公子
封邑尚垂名

途中

二年四踏兩京塵何必臨歧更問津
斜渡羊車山頂路半歌皮笠雨中人
氣驕白馬涵濡滿口過玄蟬嘯詠頻
我有知心在城闕山陰雪駕頗相隣

故福建僉憲陳公祚直道祠五十韻

日月懸臣道乾坤闢聖猷丹青開廟貌風烈見英床
寶歷三光合鴻鈞一氣流哲人當上瑞畿服產南鏐
靈派分媯汭洪條發太丘修文登石室射策步瀛洲
藩府甸

宣重河陽惠愛稠推丹置人腹囊阜達民憂豈謂褫鞶
帶仍從把鉉耨十年依大岳一旦起西疇再屬金閨籍
還乘繡使騶臣心知不貳帝德若為酬柱砥千迴浪霜
飛六月秋觸邪惟彘性批逆豈龍謀范進唐宗典蘇陳
陸相籌緝熙光聖業取善在旁求大學存條目遺編可
繹紬意誠緣物格心正乃身修利病非無實安危固有
由願防多內愆乞斬佞人頭一疏朝封入三言夕抒投
桁楊來孟博貫索下鄴侯耄稚爰書沒姬姜織室幽一

家連廿口五載作孤囚白壁塵埃盡青陽造化周日華
臨鳳宸天語出龍樓豈獨除羅網重教侍冕旒玉磨誰
可礪金鍊轉難柔按轡扞藩國飛章速轉郵嘉謨應削
凜雅志欲安劉天震雷霆怒霜號草木愁國書當極典
臣節果何尤祇見義為命不知生可偷吏持三尺法人
哭一生休政化權衡準恩厖渤澥浮解維歸北闕遷秩
按南州地肅山無警波恬海可遊孤叢斥魍魎雀角絕
譁休叔度來何暮淵明去莫留車懸桑梓重山隱桂枝

穆箕尾星辰接龍蛇日月道英靈長宇宙聲節豈浮漚
主際唐虞聖恩非闕比儔朝廷為世計章典復公收懿
德人惟好羣公志並優學祠崇秩進營兆謹封修載觀
專清廟時聞薦潔羞浚培知水木紹述美箕裘直道黃
扉扁名篇文梓哀終天弘勸在王化正悠悠

題湯三城南莊子

嘉樹夾茅堂城南十畝莊竹牕遙列岫花溆密圍牆兔
捷置施路魚肥筍在梁每來無世事祇覺道心長

道院樓子

重簷雄拔小山幽妙景容居最上頭風掃六窗塵盡去
鶴乘三洞客來遊高原樹古長依殿畫棟雲飛不礙樓
怪底霓裙浮沆瀣綠章宵拜石壇秋

贈太倉汪使君

惇

德風千里掩雄州爭解長刀換乳牛共羨漢家封卓茂
且看夫子戲言游功名此去符龜印文彩朝來壓蜃樓
最是野人懷惠切一廬今擬結滄洲

登太倉州中山子懷故襄陽李使君

州山昔始初子幸作游賓豐碑備標紀幽賞悅心神茲

來再登陟亦遇賢主人

典州汪惇使君邀遊

襄陽不可見峴首淚

盈巾

遊武將軍園亭

武君好人品園林亦不羣幽迴妙水石妍蔚盛芳芬登
眺一時盡道俗忽然分安得社工部來賦何將軍

贈邢奎

襟懷灑灑氣飄飄遊遍名都歲月遙
花暗燕臺春走馬
月明淮浦夜吹簫華顛相對舊盟在笑口一開塵慮消
更喜兒郎皆孝秀入厨甘旨足漁樵

二子甚佳以漁村
樵山自稱故云耳

題衲子詩稿

得來應是嘔心肝磨破枯蒲幾箇團
佛有語言唯說性
僧為文字不求官色離紈袴通身淨
味帶齋腸一點酸
我欲強賡三五首却憐無暇盡雕鑽

太傅王公欵月臺

青天洞蕩浮雲開東方月出臨高臺光流碧漢輪飛度
影入湖波魄共來賢主嘉賓長會合同光共景且徘徊
未詠韓公星沒句聊從太白漫停杯

南洲詞

四首為盤門
顧君梁賦

盤門向南起城裏百花洲洲邊隱客住道是顧虎頭
朝向南洲行暮向南洲宿不釣亦不泛愛看南洲綠
西風忽然起木落波粼粼水渾魚不定宵來愁殺人
春烟楊柳暗秋露芙蓉鮮慎莫生宿莽沙鷗不得眠

武帝傳

柞宮馮几畫成王淚落銅仙月似霜
王母不來方朔死
茂陵松柏自斜陽

卞將軍廟

瘦馬城西步夕曛
祠堂翼翼護英氛
下馬入門忙拜禮
行人說是卞將軍

鍾山

五岳崢嶸衛紫微
萬方臣妾仰光輝
勾陳上直天皇座

少海中巖帝子闌峯頂日華迎鳳下洞中雲滿待龍歸
終天王氣都留此花木常新鳥獸肥

金陵眺古

綠謝平蕪野燒乾西風吹雨打長干盤龍去後金釵餉
擒虎來時玉樹殘結綺閣中香炷歇景陽樓下水花寒
秦人豈識千年後終古神州奠石磐

太湖

咸池五車直下注峨眉岱嶽潛相通乾坤上下浮元氣

郡國周遭護渚宮，巖穴會因仙跡幻。
魚龍不助霸圖雄，擬把玄圭獻天子。
再看文命告神功。

虎丘二首

循麓都來幾屐蹤，異觀靈景正重重。
入門始見山和水，汲澗愁驚虎與龍。
四面更無林作伴，當頭又着塔為峯。
塵裾卓衲紛紛滿，二竺終無一个逢。

一點紫泥封岱頂，武丘雄拔闔閭城。
席前花雨天宮落，檻外雲霏脚底生。
穀輓十尋抽玉液，於菟千百逝金精。

無窮勝是王郎事吳越消亡幾戰爭

包山

影浸三州混太虛道通五嶽紐坤輿
瑤壇白兔藏仙鼎寶洞蒼龍守禹書
烟月剩將閒處媚風雷常與怒時俱
漁郎个个不識字慚愧高吟莫解居

昆福寺

壞閣尚岩堯寒房繞寂寥木撐危殿角
草出斷碑腰門鑰凝塵滅香爐火氣銷
竟空惟佛觀亦自有榮彫

白蓮寺

臺殿切層霄丹霞遠建標名傳白蓮妙年紀赤烏遙迤
灑城連郭迴環水貫橋重來擬分榻塵慮未全消

崑山清真觀

疑分疑幻海中洲只恐人間無此謀殿影四圍浮碧沁
鐘聲十里出丹樓仙人示象書仍在

玉皇閣扁
呂純陽筆

道士無

鷺字少求至竟今宵為旅客幸來何事不微留

滄洲姚家涵碧閣

寒塘帶州解幽趣似郊坰樹影倒浮綠天光平漾青石
渠方似矩板屋小如舲相對只魚鳥濠梁同性靈

贈鄧駕部

十載襟期利斷金高山無固海無深忽看鳳闕城中會
還似雞臆夢裏尋袖底電飛雷煥劍壁間泉響伯牙琴
休論鑿物知音事識取悠悠太古心

三月三日施侍御邀宴姚將軍莊宅即舊名東

郭草亭遺址

三首

共傳修禊事相命出郊原
花鳥何須眼栽培亦自村
轆轤橫轉水畚鍤削成垣
因看勞勞者懸知聖主恩

日影迂龍轡春光溢鳳城
繡衣乘暇出翠憶逐空行
姑茂金盤露郎邪石首美
簪纓雜巾褐莫遣野人驚

駘蕩三春好陂陀五里遙
篇章傳保傳

故相三楊諸公有東郭草亭集

地主識嫖姚壁上縣
瑤軫空中度玉簫
南塘無杜句深愧故人邀

金華見山亭

郡廨當空立林亭面爽開牕中列岫遠江上送青來京
兆眉長嫵陶公菊自栽安能乞勾漏把笏此徘徊

與胡二遊海珠

人誇本奇境我恨近城闈四面盡江海一拳藏寶珍魚
龍游檻砌舟楫換比鄰野馬不能到却多車蓋塵

雨窗有懷連韋二博士

薄宦將三載高情有二君天涯漫萍梗雨下憶蘭薰四
海習鑿齒千年揚子雲東隣無百室猶自歎離羣

戲簡連博士

為問礪松夫子來酒腸連日可曾開
天炎地陋佳賓少
眼底能無麴秀才

題杭州蔣自容江湖遊卷

三首

越多名族又多才
諸老篇章取次裁
但看江湖詩一卷
定知曾次不塵埃

錢夏老成無復見
張蕭逸駕亦難攀

學士錢文適公原
溥大理卿夏公李

爵太守張公汝弼黃門蕭公文明
皆卷中作者他尚多畧舉四君

風流一日同千載
猶

記當時杖屨間

自容與予皆
熟接四公者

兩人攜手五羊城
浙水東西是弟兄
但使有詩仍有酒
不妨長聽鷓鴣聲

番禺留別衡明府公式

風塵薄宦來南海
書計衰年走北畿
霄漢自憐知己少
天涯猶覺故人稀
芳菲桃李祥鸞集
重疊江山旅雁飛
為問微官是何物
相依無久又相違

隱者

白石薜蘿房青山雲水鄉
琴傳雷氏斲書是汲丘藏鹿
友同無我蜂分亦讓王枕中
藏雅道一卧即羲黃

次韻郡守胡公太湖二首

名山大川邦域內澄波皓月
方舟中魚龍窟室藏諸有
天水鴻濛望并空禹功想像
三江入唐風浩蕩九州通
茲辰更為方輿重帝遣諸侯
問上公

地軸鉤橫海嶽牽咸池直下
具區連封疆何計吳越限
光景長涵舜禹天白鳥舞波
搖定日驪龍歸洞落腥煙

木奴萬个安能住不是元公即上仙

次韻郡守胡公閱城登姑蘇臺

六門車馬簇飛埃小壘依稀說舊臺
暇日暫迂羊傅駕他年便是峴山隈
勾吳於越千秋夢范蠡西施一種才
麋鹿綺羅都不見紫烟終古鎖荒苔

又次登臺望虎丘諸山

乾坤雙眼一空亭山色能令五馬停
鹿苑尚銜吳子艷虎丘重對白公青
烟消碧落千峯出月浸巖城萬戶扃

不但登高能賦事四郊因省荷鋤丁

哭子畏 二首

天道難公也不私茫茫聚散底須知水衡於此都無準
月鑑由來最易虧不泯人間聊墨草化生何處產靈芝
知君含笑歸兜率祇為斯文世事悲

萬妾安能滅一真六如今日已無身周山既不容神鳳
魯野何須哭死麟顏氏道存非謂天子雲玄在豈稱貧
高才賸買紅塵妬身後猶聞樂禍人

再挽子畏

少日同懷天下奇，中來出世也曾期。
朱絃并絕桐薪韻，黃土生埋玉樹枝。
生老病餘吾尚在，去來今際子先知。
當時欲印樞機事，可解中宵入夢思。

送姜夢賓

二首

萬里昆黔地，于今得使君。
莫言民物幸，須識聖恩勤。
旭日開幽鄙，清霜條惠文。
爾知朝事否，便是昔朱雲。

矯矯溫州牧，清聲范史雲。
當時稱大老，今日有夫君。
德

用玉為器曾盤錦作文志行朝野慶我獨歎離羣

贈羅抱拙

休言雅志與今違吾道何曾有是非自信移山終有術

豈知流水亦容機耕田鑿井康懷日夏葛冬裘

缺二字

衣

誰信閭門名利窟此中巢許自依依

贈張守之工部

世交先進兩先生

謂守之先君與先祖父

白首今成老弟兄知我

得師終不改如君直道豈難行路無荆棘安能塞川汰

泥沙只自清皓月清風居不隔酒杯茶碗共餘情

戲為毛百朋索炭

眉山羊肉會稽鶩頗欲臨池手未和便可把君烏玉換
紙窓那得十眉呵

題沈山人藏王舍人竹枝

舍人清真同右軍金鑾退直謝雞羣千金不肯賣一葉
今日鳳毛留贈君

夢啜菜甚美

王醴侯鯖信禍胎露莖霜葉是瓊瑰如今纔享天家福
淨洗饕腸待爾來

贈承公

墻外西林是寶坊林間高卧有支郎定回斜日雲穿袖
吟斷寒更月滿牀妙梵遠通潮隱隱清陰分與柏蒼蒼
何時為取無生話共了趺蒲一夜長

戲作紀夢

何事高唐入夢遊淡雲輕雨太溫柔瑤姬錯認維摩塔

枕畔花人空抱綢

送楊禮部

君謙

我有駿馬圖持附君裝畔伯樂既上天留與何人看

觀湖宛轉思及友人

湖上秋風生碧漪看來都作憶君思君於湖水元何與
此意冥茫自不知

贈嘉興陳使君

有德由來必有言天球剛粟且清溫汲公出守謀難寢

李勉歸來國始尊，
梟獍不同麟鳳翥。
松篁會與稻粱蕃，
乾坤直氣長留在。
萬轉千迴道自存。

東松江馬別駕

螭端風采久堂堂，
漢室憂民牧守良。
淮甸已知煩汲黯，
雲間今喜得王祥。
霜寒碧落橫鵬鶚，
日麗丹崖舞鳳凰。
猶記觀梅向東閣，
緼袍長帶歲寒香。

簡嘉定王令

應鵬

江海遙分聖主憂，
春臺遲日玉壺秋。
地當大國方千里

金
卷七
才號明時第一流，欵枕潮聲竒句得。
暗庭花影早衙休。
鸞棲自古通麟閣，褒德先封漢室侯。

贈分司鈔關于戶部

初從分部謁巾冠，便略形骸露肺肝。
東有珣琪南有箭，紫為鸞鷲碧為鸞。
關譏盡道能經國王佐，何曾務守官。
下對蒼生上天子，知公心事浩漫漫。

送貳守曾公擢河南僉憲

琴鶴扁舟曉解攜，春風江郭暗棠梨。
千家霖雨邦人在。

一道冰霜憲節西奉國已知行莫止戀恩無奈喜還啼
平生志操夔臯是槐棘堂堂次第躋

重過元柳

再謁還圖笑口開客襟長戀校書臺每從王鄭求新義
試把瓊玖共品裁

君帳下一時
秀才彙集

直恐星辰驚太史豈容

江海阻雄才悠悠塵迹期君定澤國秋高更擬來

贈董五寬

邵南今隱士園北有幽居
或賣藥閉門惟讀書
白

雲媚修竹嘉木陰清渠見說新成賦題名後遂初

顧秀才陽山草堂

家住山城不到山強題詩句抗塵顏君家客坐煙蘿裡
儘著閒人自不閒

口占寄陸三

達者端居東海邊重樓高榻卧風煙想應草木扶疎下
和得淵明孟夏篇

贈隣院深上人

竹院名童子茅齋坐已公亦如王舍內却愧魯家東共
味井泉接分陰樹影中間眠時倡和律呂隔牆道

送王先輩納言歸柳州

攜將柳州劍獨下瀟湘船千里景千變一山詩一篇離
橋梅子雨歸棹桂花煙重會雲霄上大都纔二年

題人園居

未必丘樊好幽居趣自深遲行避小草高卧託喬林抱
灌惟知甕揮鋤不見金門渠終歲裏曾有惜葵心

東莊

場上雞豚爭稻穗
渡頭魚鴨避菱科
老農到處東莊有
只少君家擊壤歌

客中以微扇貺人

客裏嫁嫦娥
其如良夜何
共憐風月好
不道怨恩多
瘦骨支黃竹
輕裾疊紫羅
半年期握手
無事篋中歌

都門送施邦直歸吳興

一時青眼中
容我十里黃塵外
送君坦率自憐猶宋玉

咄嗟聞共說劉黃袖頭三尺秋潭水口底千章夏嶺雲
今歲南遊計應遂升山相訪幸相分

贈同年趙繕部

天常

劍出紅爐錦就裁霜鋒霞彩照人開雲間素有兼人士
天上今推獨步才覓句剪燈連綺席浩歌攜手看金臺
迂狂幸託金蘭尾况共高秋擢桂來

贈鮑元卿

人間有幾鮑參軍已見遺文又見君材器共為時世重

聲華相及古今聞身隨李賀新囊錦篋貯羊欣舊練裙

君藏古名流書畫甚富定武五字不損楔帖龍眠西園雅集圖等皆妙品一日京華塵土盡

十年深恨久離羣

都門贈吳淵父

時新校
巴陵尹

飛譽響江東鳴琴向楚中麒麟遊甸苑鳳鳥集梧桐氣
吐風雲動談餘瓦礫空高松一千丈深喜附唐蒙

贈崔鴻臚

深

才分震澤清山玉映人明濟北想崔瑗九江慚祝生籠

鶯道士喜辨鮓座人驚相對華風外無因共好兄

靜伯
凡淵

父交予最久其人弱冠之者俊也
不幸蚤沒句尾及之吟餘慘然

送戴戶部仲鵬冠督漕淮關

董漕分明是勝遊雲司高步向南州
戴憑不獨深經術
劉晏偏能為國謀
竒客晝談風入座
詩人宵詠月當樓
懸知燕寢多清夢
飛滿伊涼紫塞頭

長樂贈陳叅軍

浙水兩歧非異土
天涯萬里又同官
吳江蓴菜皆成夢

金史卷之八十一
庚嶺梅花且共看
立望星河秋耿耿
醉聞鐘鼓夜漫漫
人生離合真難定
明日清樽好再乾

次韻奉和左轄方公紫薇東閣之詠

仙樓十二大瀛東
何日移來此地雄
分省勢依綸閣重
栽花種與禁闈同
文書靜向高明處
星宿芒寒掌握中
知是望京丹
悵切凌烟早晚聖恩濃

答鄭河源見贈

腐芥終依虎魄靈
相逢莫道是雲萍
因思舊雨來今雨

却喜文星是使星
榕葉作團風獵獵
桂花含暈霧冥冥
但教光彩長分照
萬里何妨客紫溟

春夜懷鄭河源

傳裏詩筒兩度過
河源君子近如何
甘棠晝永迷青野
芳杜春深覆綠波
兩地頗同多枳棘
九州何處奏絃歌
唯應知己情難捨
早晚踈蹤入薜蘿

海珠寺送黃提刑

風行五嶠過三山
又得趨庭未是還
天下望公知已久

全宋詩卷之八十一
卷七
朝廷求治亦非艱波澄番舶鯨鯢靜筆倚騷壇草木閑
瞻戀清光惟此夕月華休下海珠灣

次韻答河源鄭侯見贈

千古高風一日還摩挲塵眼對清顏且煩元亮為彭澤
終使羊公重峴山渤海未容蠡辨測女蘿猶許兔絲攀
勞君乞與山陰譜借取仁言此諭頑

借前韻贈韋博士

曾有靈丹熟九還刀圭能駐世人顏盤開首宿先生饌

書對神光學士山席上令行椰酒急袖中香散桂枝攀
英才滿座霑時雨莫信昌黎道鯁頑

又借韻自賦一首用呈諸公

纔到炎方便憶還空歌遊子劍前顏窮秋陽鳥遵遙渚
短景浮雲出故山閒被放衙星未沒推牕觀海日將攀
諸公總是藍田壁不棄他山老石頑

答張掌教再次韻

泮宮清寂坐齋心風閣微傳絃誦音善價未能酬美玉

佳篇重辱惠兼金窗中遠岫浮青靄門外虛塘卧綠沈
擬向清風明月夜飄然來此共披襟

送張掌教致仕歸臨江

青眼摩挲醉袂分那堪客裏別夫君風情好似陶彭澤
官職常如鄭廣文渝水晚沙眠宿鷺蒙山老樹暎歸雲
虛堂索句昏鐘靜宦海潺湲想未聞

懷星堂集卷七